

東華續錄

光緒十五年十二

臣朱壽朋敬編

臣汪錫增恭校

二月己卯朔諭兵部奏本年輪應查閱直隸等省營伍一摺直隸卽派裕祿山西卽派胡聘之陝西卽派魏光燾四川卽派奎俊甘肅卽派陶模認真查閱各省營伍關繫緊要前經迭諭各將軍督撫汰弱留強加意訓練原期一兵得一兵之用該督撫等務當切實簡校如有技藝生疎軍實不齊等弊卽將該管將弁據實嚴參不得稍涉瞻徇以副朝廷整飭戎行至意○張汝梅奏准總理各國事務衙門咨光緒二十四年八月二十八日會同吏部具奏登州府同知移駐威海作爲海防同知要缺援照奉天營口海防同知之例辦理中外交涉事件其應作爲何項要缺及一切未盡事宜再由該撫體察情形辦理一摺本日奉 硃批依議欽此欽遵咨行到臣當經體察情形飭司籌議辦理伏查山東威海衛在登州府文登縣西北一百里地處偏隅曾設威海司巡檢一員自海疆多事以來交涉頓繁分派員紳專司其事現又租與英國屯泊兵輪洋務倍繁於前非移駐職分稍大之員不足以資控制查吏部則例內載奉天營口地方添設同知一員專司稽察彈壓作海防要缺同知由該府尹等於奉天所屬人員酌量升調題補照例

辦理該同知年限俸滿別無違礙處分由該府尹等出具考語送部引見後歸部遇有知府缺出不論俸項雙單月均予卽升不積正班之缺仍在任候升時加體察如人地未宜辦理不善卽行分別參辦撤回改補等語今登州府簡缺同知既經總理各國事務衙門會同吏部奏奉諭旨允准移駐威海改爲要缺應請援照營口同知成例作爲外調海防要缺同知由外酌量升調題補優予升途如人地未宜辦理不善卽行分別撤回改補該同知專司海防水利稽察彈壓遇有中外交涉事件隨時稟承巡撫關道妥籌辦理以期內治外交兩有神益其餘命盜錢糧戶婚田產與夫一切詞訟案件仍歸文登縣審理以符舊制至應支俸工養廉等項均可照舊支領毋庸另議增添同知關防篆文無分繁簡亦可毋庸鑄換已飭現任登州府同知吉慶先行移駐威海就地經營衙署如何安設及一切未盡事宜仍飭妥議籌辦並察看該員吉慶能否勝任再行分別去留更調用昭慎重不敢稍涉遷就惟改缺例應繁簡互換東省繁缺同知現均無可更改且此次改缺係奉旨允准之案與尋常改缺不同自應免其與他缺更換抵補下部議奏○辛巳諭山東巡撫張汝梅著開缺聽候查辦○以毓賢爲山東巡撫○毓賢奏奴才蒞任後查詢江甯八旗現在頭甲大小甲兵六百餘名係江甯原來駐防兵丁之後其二甲三甲兵丁將及二千名係由荊州先後調來統計尙缺四五兩甲共約一千多名不符早年原額之數惟察看各兵丁

及其家口多屬藍縷異常情形窘苦推原其故皆因月領餉銀食用之外並無盈餘加以食指繁多毫無恆產接濟是以多同乞丐溯查金陵地方咸豐三年被粵匪攻陷旗營官兵三萬餘人無不血戰捐軀雖婦女孺子亦能守城殉節間有服官隨任在外者幸免於難遭禍之慘甲於天下其所存之六百餘名盡屬忠魂後裔追思往事莫不傷懷查得駐寧八旗早年自置八卦洲地畝每年可收租銀一萬兩有零各旗分用稍資敷衍辦公正項亦出於此自前將軍豐紳到任以來不知潔己奉公以缺苦爲口實每將自己私用影射開支脔削多端任意浮冒每至年終清算卽或稍有餘項所分無幾衆口嗷嗷何濟於事夫練兵之道必先令其溫飽而後能用其精力既充斯膽氣漸壯然後嚴以紀律勤以訓練方成勁旅今既如此成何軍政若不極力整頓何以收士飽馬騰之效奴才體察兵艱日夜籌策先將到任後所有供給概行裁革所用一切自行發價嗣後署內支銷不准在八卦洲地租內動用分毫署外各旗必不可少之用項或裁或減認真經理以期稍蘇兵困倘有把持侵蝕等弊一經查出卽據實糾參絕不稍徇情面而負初心現已飭查八旗大小甲兵內及閒散中究有年少精壯者各若干人將來如何籌畫再行籲懇天恩得旨辦理甚是嗣後卽著崇善認真經理毋蹈故轍○劉坤一奏欽奉電傳上諭中國創建水師歷有年所惟是制勝之道首在得人欲求堪任將領之才必以學堂爲根本應如何增設學額添製練

船講求駕駛諳習風濤以備異日增購戰艦可期統帶得力著南北洋大臣沿海各將軍督撫一體實力籌辦妥議具奏等因欽此仰見 聖主力圖自強固國育才之至意欽服莫名 臣維各國爭雄海上船堅礮利日異月新水師規模較前迴勝南洋舟艦未備欸項維艱欲增購戰船成一大枝水師非外省財力所能猝辦惟有就原設學堂增設學額添製練船俾各認真講習藉收拔十得五之效當飭該堂總辦道員柯銘欽遵辦理頃據詳稱江南水師學堂創立之始原係駕駛管輪兩門各分三班招考生徒分別誅授自英德語文而外凡句股算術幾何代數平弧三角重學微積以及中西海道星辰部位駕駛御風測量繪圖諸法帆纜鎗礮輪機大要皆當次第研求堂課畢業派登練船俾周覽山海形勢沙礮風濤更番巡歷以練膽識祇以各生學成登進不廣學額裁復無恆上年冬間又因經費奇絀將三班學生四十名暨裁撤咨部有案現值 國家整軍經武廣儲將才以學堂爲水師之根本遵將原裁三班學生四十名暨教習員司人等招募添設一切薪費仍照前額原數開支於十月初一日考取入堂照常肄業至巡練之船現有寶泰一艘疊經督帶駕駛管輪頭班學生周歷海島諳習風濤再派赴各兵輪循章補用卽帶三班學生先後登船約計兩年船課均可畢業似此循環督練暫可不另添船等情前來當飭查照向章斟酌定額督率教習人等認真訓迪就其造詣之深淺以爲升降之等差尤當中西並肆時以經史大義輔

機新法與之朝夕講求俾咸知明恥教戰之義因時制變之方異日馳驅海上庶足備國家千城之選得旨知道了卽著督飭柯銘等認真訓練毋得始勤終怠致成具文○壬午以錫良爲湖南布政使調文光爲湖南按察使以張曾文爲四川按察使○以崇善爲江甯將軍調綽哈爾爲錦州副都統以奇克伸布爲福州副都統○諭前據署江甯將軍毓賢奏江甯八旗自置八卦洲地畝每年收租萬餘兩原爲辦公欸項前任將軍每將自己私用任意開支以致兵丁苦累現經毓賢竭力整頓自到任後所有供給概行裁革嗣後署內支銷不准在地租內動用該署將軍潔己奉公洵堪嘉尙各省八旗駐防該管將軍若皆能如此認真整頓何至餉項虛糜兵不宿飽嗣後務當督飭協佐等員力裁浮費毋得因仍故習藉口於公費不敷任意朘削因念各省督撫恐亦不免有州縣供給之處州縣藉口辦差苦累非挪移公項卽科派民間其或督撫受其挾持於州縣陋規名目不肯逕予裁革殊非核實辦公之道嗣後各省將軍督撫皆當整躬率屬廉儉自持不准絲毫累及所屬其局所辦公經費亦不得任意浮冒影射支銷庶幾大法小廉吏治蒸蒸日上朝廷有厚望焉○李鴻章任道鎔張汝梅奏山東黃河自咸豐間銅瓦廂改道以來光緒八年後潰溢屢見遂普築兩岸大堤尺寸初不高寬乃民間先就河涯築有小埧隨灣就曲緊逼黃流又因河灘淤高埧自加增官民相率守埧大堤日久失修每遇汛漲埧決堤亦隨決此歷年失事

病根也古今言治河者惟讓地於水實爲上策其次則惟有展寬河身今兩岸大堤相距有五六里至八九里不等應卽就此兩堤加培高厚永爲修守似不失爲中策第兩岸之中先有棄堤守埝之處小民安土重遷不肯遠去非可旦夕議定暫宜照舊守埝徐圖更張至下口入海尾閘尤關全局現在水行綵網口入海去路偏向東南形勢不順不能築堤旣無以束水攻沙故不免下壅上潰今勘得鐵門關故道尙有十餘里可通海口較綵網口韓家垣兩路爲順工亦較省然建攔河大壩一座挑深引河三十餘里修築兩岸大堤八十餘里所需工費頗鉅惟是下口不治全河皆病今欲大加整頓不得不從長計議核實勘估其餘如添修費以固根本設減壩以洩異漲以及設堡夫辦豁免設驢汛等事雖有先後緩急之分實爲將來不可少之舉大約此項鉅工五六年可期辦竣略如從前南河規模但需南河三四年修費則一切法制犁然畢具而山東無蓄清敵黃之累收效亦較爲遠大李鴻章又上所籌十策及比國工程師盧法爾擬具治河新法並奏遷民修堤之舉繁瑣委曲斷難尅期告成而頻年決溢河底積淤如再節次決口不特一切工程種種棘手兩岸災民何忍再罹昏墊爲今之計惟有擇要加修兩岸堤埝疏通海口尾閘旣爲目前救急善策亦卽治標以待治本之要圖 上諭前因山東黃河工程緊要特派大學士李鴻章馳往山東會同任道鎔張汝梅周歷勘勘妥議具奏茲據李鴻章等聯銜覆奏並會議黃河大治

切實辦法及救急辦法詳議章程繪圖呈覽各摺片事關山東全省河防工程尤關重大著軍機大臣大學士六部九卿翰詹科道一體會議奏摺二件片一件單圖五件併發○總理各國事務衙門奏定地方官與教中往來事宜五條其文曰天主教在中國各省地方建立教堂久奉 國家允准奉行茲因欲使民教相安便於保護起見議定地方接待教士事宜數條如下 一分則教中品秩如主教其品位既與督撫相同應准其請見總督巡撫倘主教有事回國或因病出缺護理主教印務之司鐸亦准其請見督撫攝位司鐸大司鐸准其請見司道其餘司鐸准其請見府廳州縣各官亦按照品秩以禮相答 一主教應將所派專與官長交涉辦事各司鐸名姓教堂住處開單報明督撫以便飭屬照章接待凡請見地方官及專派辦事之各司鐸均應西人充當或有事西司鐸未能熟悉華語可暫令華司鐸幫同傳譯 一主教居住外府無事自不必遠赴省城請見督撫遇有新督撫蒞任主教更換新到或賀年節均准其向督撫修書或寄遞名刺致禮督撫如禮答覆至各司鐸更換新到應持有主教函據方可照品請見司道府廳州縣等官 一各省出有重要教案所在之主教司鐸等須轉請教皇專託保護天主教之國之公使或領事官同總理各國事務衙門或地方官辦理了結可先徑向地方官商辦了結以免多費周折該地方官遇主教司鐸等員來商應迅速和衷商辦擬結 一地方官應隨時曉諭約束所在平民務與

教民一視同心不得挾嫌構釁主教司鐸等亦應勸誡教眾專心嚮善以保教中聲名俾令平民悅服如民教涉訟地方官務須持平審辦教士亦不干預袒護以期教民相安得 旨如所議行○諭前因已故將軍豐紳屢立戰功當經降旨賜卹予諡並於立功省分建立專祠以示優異茲據御史彭述奏稱豐紳前在江寧將軍任內股削浮冒罔恤兵艱請將卹典量予裁抑等語前江寧將軍豐紳著撤去建立專祠並毋庸予諡○癸未諭前據興廉奏呼圖克圖報効銀兩請賞龍繖各項等語當經諭令理藩院檢査成案茲據該衙門查明覆奏哲布尊丹呼圖克圖於昭信股票案內報効鉅款實屬深明大義著賞給龍繖一柄龍緞靠被一分以示優異貝子銜巴特瑪車林且著加恩賞換雙眼花翎○甲申諭前因崑岡奏查辦 西陵守護大臣毓慶等參欵未能詳晰當經諭令再行確查具奏茲據奏稱遵旨將駁查各條並原參各節覆審明確詳晰擬議據實覆陳一摺此案經該大學士兩次委員密查並奏准咨行原參之泰甯鎮總兵祥霖逐一指實聲覆再四推求毫無遁飾固山貝子毓慶縱容家人並信任劣員 陵寢重要之地毫無整頓實屬有負委任奉恩鎮國公全榮不能約束家人屬員弊混亦未覺察不勝守護之任毓慶全榮均著開去守護差使交宗人府分別議處翼長茂勝素有心疾並不時赴府摺奏文牘多出其手防禦岳嵐常在府中回事處坐談俱屬不合該二員業經撤去兼行差使均著交部議處兼管牛羊圈之禮

部員外郎錫拉藻奎秀聯秀盤查不力著一併交部議處防禦增立秀明於兵丁借舖修房一案應存侵蝕辦公不實均著卽行革職逸犯徐岳泉情節較重仍著該衙門嚴拿務獲送部治罪其訊係無干及該總兵未能指實各節均著毋庸置議餘著照所議辦理至該大學士前奏擬定牛羊圈稽查工程並借餉修房酌予限制各事宜均著照所議行該衙門知道○諭前因積穀保甲團練等事均爲國計民生所係迭經諭令各省認真籌辦其已經定議覆奏者務當力踐其言事事皆求實際辦有成效仍隨時奏聞尙未定議具奏者卽著各該督撫各就地方情形妥定切實章程迅卽奏明辦理勿再延緩朝廷念切民依要在實事求是言之匪艱行之惟艱各疆臣身膺重寄必當共體此意也將此通諭知之○丙戌鄧華熙劉坤一裕長奏上年十一月間安徽渦陽土匪劉疙瘡牛世修等倡亂起事勢甚披猖臣坤一臣華熙先後接據署宿州知州瞿世琬電稟當經分電徐州皖北鎮道派兵馳往相機剿辦並飭原駐亳州之威靖營統領副將張雲松飛飭所部迅往兜拿一面電知臣裕長轉飭歸德鎮嚴防永城一路並協力會剿以期速了而免竄擾壽春鎮總兵郭寶昌鳳潁六泗道李光久相距較近聞信後卽分派參將李桂馨帶皖北馬隊赴宿州參將王鳳台帶卓勝防營步隊赴渦陽郭寶昌復自壽州親率提督高得勝都司杜椿林等分帶練軍防勇前進並由臣華熙添派記名提督韓大武督率練軍安定左右兩營及馬隊礮隊又飭

游擊陸恩甲帶精健前營分由安慶蕪湖拔隊星夜馳赴援應徐州鎮總兵劉青煦徐州道桂嵩慶聞信先後派游擊熊長春及哨弁高文陞外委歐陽松均各率馬隊分赴臨渙集灘溪口駐紮劉青煦復親率管帶徐防馬隊右營參將黃青雲等抽調徐防馬步隊前進並由臣坤一添調銘軍隊百騎元字步隊二百名飭派都司陳凱彭壽長管帶隨同劉青煦前往臨渙助剿臣裕長亦電令歸德鎮總兵武朝聘親帶得力弁兵迅往永城堵禦並先後飭派總兵楊鴻禮督帶馬步兩營會同協剿副將朱東成帶礮隊赴歸德駐紮策應該鎮等三面進兵縱橫掃盪渠魁授首地方救平業經臣等隨時電奏在案伏查此次各匪首多係積年漏網之盜土人謂之桿子頭平時專以搶劫爲生在渦蒙亳宿及徐州歸德三省交界處所此拿彼竄蹤跡詭秘異常近以地方荒歉遂以爲時會可乘潛作逆謀揭竿而起首逆劉疙瘩卽劉朝棟最爲兇悍又有牛世修卽牛汝秀家在草市與已故甘肅寧夏鎮總兵牛世韓爲同族知其家藏有鎗礮子彈遂於十一月二十六日先搶該故總兵家軍械繼搶鹽棧銀錢二十七日掠石弓山二十八日攻龍山營署該營游擊壽右營都司何師程先期與右軍守備秦德榮赴壽春鎮署稟商冬防事宜署左軍守備李鴻標知有匪起繼往壽州請兵千總吳有謀率兵抵禦身受重傷外委吳玉階隊目邵廷傑李燕隆及圩長張德馨同時戰歿兵丁傷亡大半民團死者百餘人何師程等聞警馳回該營先於二十九日失

陷軍袋糧餉文卷等件被擄一空當匪衆初起時僅二三百人劉疙瘩由丹城南竄賊目魏得武余盛五等互相勾結不數日間衆逾二千賊馬亦百餘騎恃有鎗械利器頑民相率附和窮黎被脅愈裏愈多其攻渦陽縣城也該縣知縣歐陽靄自募勇二百名紳董王開朗馬驥才等招集練丁協同固守威靖營統領張雲松在亳州聞報派守備韓大坤帶馬隊三十名於二十八日先到自率步隊百名於二十九日繼至何師程等亦卽馳來救援內外夾擊立解城圍賊遂踞百弓丹城等處爲巢穴分路竄擾北犯河南永城縣界圖至山東與大刀匪合夥甫越童溝集犯馬村橋聞歸德鎮兵到仍折而南撲白龍廟其西路一股於十二月初一日突撲義門集該處巡檢宋超把總孫傳曾率汛兵民團拒敵威靖營勇應之殺賊二百餘人生擒三四十人賊敗遁去初三日復糾大股來犯奸民內訌該集遂被佔踞其時渦河南北匪徒乘機響應孫凌志起於義門集燕懷軍起於燕家牌坊邵大發葛懷玉等起於鄆家集統計醜類不下二萬餘人大致分南北兩股附近村鎮相繼不守焚殺奔馳幾遍渦陽全境宿州在渦陽之東臨渙集與曹市相接該州瞿世琬得信後募勇兵三百名會同宿州營游擊譚新益威靖右營游擊陳懷德各率兵勇並由在籍總兵王心忠親率練丁併力嚴防更番巡哨匪衆屢次侵犯皆不得逞而回李桂馨率馬隊迅至會合陳懷德於十二月初七日由臨渙抵龍山接戰殺賊百餘得馬十一匹張雲松亦在張老莊與賊

開仗獲勝初八日武朝聘率隊在燕家牌坊東南程家樓與匪首王毛拚接仗賊眾千餘營官孔昭魁張連山率馬隊左右包抄黃貫三陳錫率步隊直搗中堅自午至未賊無懈志幸我軍快礮得力賊少卻各隊乘機猛進立將王毛拚鎗斃並斬殺五百餘名生擒二百餘名奪獲賊械三百餘件餘匪逃竄該鎮兼程前進首挫兇鋒最爲奮勉是日劉青煦率所部各營隊行抵臨渙集與該處紳士直隸委用道袁大化詢商一切初九日卯刻親督隊伍由臨渙向張家圩子道竹橋等處進剿袁大化亦來助戰行十餘里匪首劉疙瘩率悍黨馬步數千蜂擁而來劉青煦卽分兵三路飭營官陳凱彭壽長爲左路營官熊長春哨官李金芝爲右路縣丞劉燾附生劉榮督隊進攻自率營官黃青雲訓導鄧嘉緝附生姚衡熙等居中策應匪用結帶陣接戰鎗子密如雨落陳凱熊長春黃青雲彭壽長李金芝及幫帶劉國湘哨官劉炳章徐增祥等皆奮不顧身帶隊衝鋒用連環排鎗轟擊匪亦冒死抗拒血戰二三時之久賊勢大敗奔竄橫屍徧野我軍帶傷者亦數十人跟蹤追剿克復石弓山卽晚收隊繳割髮辮計殺匪五百二十三人生擒七十五人訊供有匪首劉醜卽劉晝遠業已陣斃隨將被虜齒稚者數人省釋餘均正法是役也奪獲火藥車十三輛鉛丸百餘斤擡礮綫鎗甚多旗幟七十餘面馬牛騾百餘匹聲威大振賊膽已寒李桂馨亦與王鳳台韓大坤何師程等在張連莊殺賊七十餘級奪獲鎗械旗幟多件哨官儘先千總李德才陣亡威

靖馬勇受傷者九名先是郭寶昌親率馬步隊次渦南蒙城縣屬之小澗集地當四達消息靈通深知蒙城各圩多與匪通遂於初八親督卓練兩哨馳往鹿家圩猝不及料懼於兵威當將爲首之鹿小貴送出訊明正法傳集附近各圩諭以洗心革面辦團禦賊概免深究賊首劉成擁衆王家寨抗違不服立即派隊往捕擒獲斬梟由是遠近各圩帖然反正不敢再懷異志矣後路已清維時劉青煦已在道竹橋大獲勝仗武朝聘亦有燕家牌坊之捷賊勢漸衰正擬三處進攻卻大發一股忽由渦南竄入張村鋪聲言將入鳳臺阜陽等處郭寶昌飛飭高得勝杜椿林各率百餘人會同李桂馨追剿而自移紮西陽集以防南北合股初十日劉青煦率隊進攻青町集西之段家營該匪死黨皆聚於此馬步約六七千人自經道竹橋之敗意在死戰布列十餘陣後靠大莊爲接濟前面兩村中空里餘以防我軍抄突頗得地勢左右莊均有埋伏劉青煦仍分中左右三路進擊匪畏鎗彈改結帶陣抽綫頭蛇行逼進志在短兵相接陳凱熊長春黃青雲彭壽長等帶隊挺身猛撲劉青煦揮軍從左右旁穿側出賊以兩面受鎗所伏馬賊齊起衝突欲圖包裹劉青煦分馬步隊截擊匪始大敗奔潰我軍奮勇跟追直至龍山立時克復陣斃賊目七八人餘匪三百餘人生擒二十三人奪獲旗幟鎗礮銅號海螺多件牛馬多匹勇丁陣亡三人受傷六十餘人劉疙瘡窮感達遁同日郭寶昌所派營官王鳳台復大勝於焦家樓殺賊百餘名生擒五名武朝聘亦

由白龍廟進攻三路兇擊賊遂不支十二日首逆劉疙瘩逃至青町集何師程率勇圍拿立時成擒供認爲總盟主不諱高得勝杜椿林李桂馨復於程家莊陣傷邵大發因而就獲供認爲僞仁義王均卽正法餘黨潰散大致平定韓大武所部馬隊營官總兵徐全喜行抵關墮佛鎮等處迎剿南竄股匪追殺至王市孫家等集四十餘里斃賊甚多另股白旗首燕懷軍卽燕鴻勳糾集千人自稱堂主在義門楚店等集敗於官軍遂由尹家溝渡河向西南逃走復經王鳳台高得勝李桂馨等乘勝追奔三四十里殲賊數百人截獲軍械馬匹無算生擒燕懷軍亦卽正法魏得成先爲劉疙瘩戕害孫凌志則爲王鳳台陣斬小花旗匪首馬啟芳劉石匪目王秀明王鳳文王金標王遲劉會王在天均爲劉青煦拿獲渦匪軍師王三邪子爲永城營參將陳錫拿獲匪首張狐狸潘黑兒爲豫正軍副將朱東成拿獲至是渦南北股匪皆就肅清而亳州泥台店又有匪首魯士林聚眾踵起旗書大魯王字樣旋爲總兵楊鴻禮設計誘獲解送亳州訊明電稟飭卽正法仍有劉疙瘩等餘黨分竄亳州東南邊境三岔口成福寨等處是時韓大武前隊已抵渦陽張雲松帶隊回亳州防堵十三日至三岔口北丁固寺匪徒尙有千人賊馬數十騎當卽排隊奮擊傷賊數十並奪得賊騎匪械餘眾逃散十四日又在立法寺率勇會團與賊接戰追至孫家營陣斬多名擒獲匪目劉老么袁世真及羽黨劉遠蘇玉田等解州訊辦劉青煦郭寶昌武朝聘至臨渙會商善後

事宜營隊四出搜拿餘黨並無賊股於是留韓大武練軍兩營陸恩甲精健一營並添步勇兩營共六百名馬隊一起八十名會同原駐皖北練防各營分駐渦蒙亳太等處嚴密巡緝復由徐州鎮酌留馬隊扼紮宿州地界聯絡聲援以資鎮懾劉青煦郭寶昌武朝聘各回本鎮一面由臣坤一臣華熙將續調之衛字三旗皖南二營分別調回原防惟首逆牛世修卽牛汝秀在逃未獲疊經懸立重賞飭拿於本年正月十四日在駱駝集擒獲解交蒙城縣訊明批飭正法此三省官軍合力剿辦之實在情形也當匪勢方熾之日兵力注重於渦陽鄰近各州縣惟賴團練以自固蒙城本駐勇無多十二月初八日匪首閻好文等率黨七八百人欲南犯鳳臺圍壘集蒙城董家圩經劉家集外委李維桐約集鄰莊練衆奮力截殺陣斬閻好文餘匪卻走初九初十等日藍旗賊首葛懷玉與邵大發率衆攻董家集署蒙城縣知縣曾光煦戒備在先會同在籍總兵李南華候補副將馬玉書都司趙大有陳樹楨等親督團練並調二十八集練丁數千人在董家集陳家莊王氏集等處與匪連日鏖戰陣斃千餘人生擒葛懷玉及匪目馬岐山劉長發牛士素李大堂等十名奪獲大礮洋鎗子藥馬匹甚多武童武文思精習飛鎗衝鋒勇往尤爲得力團勇僅傷數十人外委李維桐之第六品軍功李維楷陣亡其西竄股匪由張村鋪入阜陽王市集分擾馮家圩劉家店等處原駐練軍先經抽調至渦阜陽縣知縣黃家傑募勇未齊於初九日調集各鄉團丁六百

餘人會同守備徐振清迎頭堵剿斃賊數百名奪得旗械多件追趕敗賊急渡淝河而遁又經渦陽圍練
擊斃二百餘人十一日復有賊至順河集亦被團丁擊退追殺百餘人殘賊零落遁入亳州邊界高公廟
一帶十二日團衆又在路家圩楊家寨等處敗匪斬首二百餘級民人陣亡一人受傷十餘人亳州駐防
威靖營勇盡數調赴前敵城關地面空虛游匪勢將竊發署亳州知州孫鳴皋毫營都司劉吉榮會同請
假在籍新授廣西右江鎮總兵李永芳前廣東潮州鎮總兵劉世俊招集舊部添募團勇三百名其餘城
鄉紳商集資共募六百五十名晝夜巡邏防範周密又挑選精壯回民與河下商船舉辦水練一團爲護
城接應之計城守既固李永芳劉世俊於十二月初七初九等日馳赴東鄉十九里溝辛橋集張信溜等
堡緝拿聚衆滋擾游匪當場格斃四名擒獲首夥六名內有羅亨潮一犯係與魯士林同謀起事十三十
四等日又會合威靖營在忠心集龍得寺等處截擊竄匪殺斃三百餘名生擒十餘名奪得車馬刀械多
件並在賊目懷中搜出盟帖名單先後送交該州訊供懲辦該州在和集堡離城較遠董家寨有賊踞擾
適署太和縣知縣袁孝昌巡至邊界聯絡洪山等堡鄉團初九日與匪接仗獲勝殺賊數十人獲賊鎗械
多件當將該寨收復宿州邊境之三義集袁家店等處竄入匪跡經該州壯勇民團隨時打退其五鋪三
鋪丁家圩等處有匪勾結思逞分派勇役捕拿亦卽解散分防濉溪口書鳳類同知程璧分汛把總李修